

06 MAY 2003

DINAR-KONVENSYEN/I

DEWAN PERDAGANGAN ISLAM ANJUR KONVENSYEN MENGENAI DINAR EMAS

Oleh: Yong Soo Heong

KUALA LUMPUR, 6 Mei (Bernama) -- Dewan Perdagangan Islam Malaysia (DPIM) cawangan Kuala Lumpur akan mengadakan konvensyen sehari mengenai penggunaan dinar emas sebagai perantara alternatif bagi perdagangan antarabangsa.

Konvensyen itu akan diadakan di Pusat Dagangan Dunia Putra (PWTC) di sini pada 1 Julai ini, kata pengerusinya, Tan Sri Elyas Omar.

Beliau berkata dewan itu telah menjemput Perdana Menteri Datuk Seri Dr Mahathir Mohamad untuk merasmikan konvensyen dan memberikan ucap tama.

Elyas berkata dewan itu berharap akan dapat menarik kira-kira 500 peserta dari dalam dan luar negara ke konvensyen yang akan diadakan dalam Bahasa Inggeris.

Konvensyen itu bermatlamat untuk meningkatkan pengetahuan tentang penggunaan dinar emas, katanya kepada Bernama ketika melawat agensi berita kebangsaan itu di Wisma Bernama di sini, bersama-sama dengan ahli jawatankuasa DPIM.

Elyas berkata dewan itu juga berharap akan dapat mengeratkan hubungan dua hala dengan dewan-dewan perdagangan di negara lain.

Ia akan membolehkan para anggotanya mendapat faedah daripada aturan rangkaian dengan rakan-rakan dagang dari negara lain, katanya.

Kini, cawangan Kuala Lumpur dewan itu mempunyai kira-kira 200 anggota. Jumlah keanggotaan dewan di peringkat kebangsaan kira-kira 4,000.

Elyas berkata dewan itu berharap akan dapat menarik lebih ramai usahawan Islam, khususnya dari industri kecil dan sederhana, menyertai badan itu.

"Dewan itu boleh bertindak sebagai pusat sehati bagi keperluan mereka dalam bidang-bidang seperti pembinaan keupayaan serta dalam berurusan dengan agensi-agensi kerajaan seperti Perbadanan Pembangunan Industri Kecil dan Sederhana (SMIDEC) untuk mendapatkan bantuan pembiayaan, contohnya," katanya.

Elyas juga berkata cawangan Kuala Lumpur kini menerokai kemungkinan mengimport tukang-tukang mahir bagi mengindahkan lagi masjid-masjid di Malaysia.

Ini kerana masjid-masjid di Asia Barat dihiasi dengan seni khat dan seni ukir Islam yang cantik, dan yang tidak banyak terdapat di Malaysia.

"Kita boleh menggunakan kemahiran mereka dalam bidang ini untuk mengindahkan lagi masjid-masjid kita," katanya. -- BERNAMA

SHY MR JR